

# Las cuschinieras han en las chautschas

San Murezzan: Festival per gourmets 2020

DA GION NUTEGN STGIER / ANR

■ **Tar la 27avla ediziun da l'occurrentza per gourmets datti ina premiera. Per ina giada na sattan betg cuschinieras en il focus, mabain cuschinieras. Diesch cuschinieras internaziunalas segnan per glamur culinara a San Murezzan e conturn.** Il Festival per gourmets è nagina concorrenza da cuschinar, mabain in event cun la finamira da dar cuminaivel novs impuls al mund culinaric en l'Engiadin'Auta. Da pudair sa participar al Gourmet Festival è per mintga cuschinier e cuschiniera ina vaira onur. Quel tutga en tuts regards tar in dals festivals singulars dal mund ed è en il frament bunamain cult. La 27avla ediziun

dal Festival per gourmets ha lieu dals 30 da schaner fin ils 8 da favrer 2020.

## In cler signal

La persuna che maina il Gourmet Festival e che segna per la recrutaziun dals cuschiniers e da las cuschinieras è dapi dus onns *Fabrizio Zanetti*, il schef-cuschinier da l'hotel da luxus Suvretta a San Murezzan. Cun envidar per la nova ediziun dal festival be cuschinieras a San Murezzan e conturn ins mettia in cler signal. En la cuschina elevada ed en la gastronomia da la classa superiura stettian anc adina be ils cuschiniers en il center, er sche la branschja enconuscha fitg bunas e capavlas cuschinieras, punctuescha Zanetti. Sia finamira saja stada en vair senn da guardar

per ina giada sur l'ur dal plat or. Las diesch cuschinieras che sajan da la partida al Festival per gourmets 2020 sajan en cuschina vairas artistas, ellas sajan ambassaduras culinaras da lur patria e tutgian tar las meglras cuschinieras dal mund, menziuna Zanetti.

## Roma, Londra e Kopenhagen

Da las diesch cuschinieras derivan quartier da restaurants che sa chattan en l'Europa. Da Roma a San Murezzan vegn a la fin da schaner 2020 *Cristina Bowerman* (2018 meglra cuschiniera da l'Europa) dal restaurant da luxus «Glass Hosteria». Ella vegn ad esser giast en l'hotel da tschintg stailas Carlton a San Murezzan. Duas cuschinieras vegnan da Londra en l'Engiadin'Auta. Quai è la *Coreana Judy Joo* che cuschina en l'hotel Badrutt's Palace ed *Asma Kahn*, ella che vegn a procurar per deletgs culinars en l'hotel Kulm a San Murezzan. *Kamilla Seidler*, ella è la cuschiniera dal restaurant nobel «Lola» a Kopenhagen, (plaz 28 dals meglers restaurants dal mund). La dunna vegn durant l'occurrentza er a cuschinar en l'hotel Waldhaus da la famiglia Dietrich a Segl.

## Trais cuschinieras da l'Asia

Per intgins dis in auter clima vegnan ad avair a San Murezzan las trais cuschinieras che vegnan da l'Asia. Oz ha er la cuschina asiata ses post fix en la gastronomia elevada. *Lanshu Chen* dal Taiwan, ella vegn a cumbinar la cuschina indigena cun la cuschina franzosa. *Renu Homsombat*, ella cuschina per ils giasts dal tempel per gourmets «Saffron» a Bangkok. Er ella è da la partida al Festival per gourmets en l'Engiadin'Auta. Medemamain da la chapitala da la Tailanda vegn la cuschiniera *Bee Satongun* (ina staila Michelin).



**Renu Homsombat, ina da las meglras cuschinieras dal mund, vegn er a l'occurrentza a la fin da schaner 2020.**

## Da la Brasilia e da Chile a San Murezzan

*Emma Bengtsson*, ella è uriunda da la Svezia, cuschina però dapi intgins onns al restaurant da luxus «Aquavit» a New York. Per sia cuschina ha ella retschet duas stailas da Michelin. Er ella vegn a fascinar cun sias spaisas ils mangiabains a San Murezzan e conturn. *Carolina Bazan*, ella maina a Santiago de Chile il lo-

cal nobel «Ambrosia» e durant il Gourmet Festival è ella en cuschina da l'hotel Saratz a Puntraschigna. La cuschiniera *Bel Coelho*, ella vegn da São Paulo e vegn a mussar ses art culinaric en l'hotel Kronenhof a Puntraschigna, ina da las top adressas en l'Engiadin'Auta. Cunt tantas cuschinieras ins dastga bain dir che per ina giada han ellas en las chautschas!



**Fabrizio Zanetti, el è dapi dus onns il manader dal Festival per gourmets a San Murezzan e conturn.**

FOTOS MAD